

ERINDISBRÉF

fyrir kennara í barna- og gagnfræðastigsskólum.

I. Almenn ákvæði.

1. gr.

Kennara, sem skipaður er, settur eða ráðinn til þess að gegna stöðu við skóla, er skylt að gegna starfi sínu samvirkusamlega í samræmi við þau lög, reglur og fyrirmæli um kennslu og skólamál, sem gilda á hverjum tíma.

2. gr.

Kennarar skulu leitast við að haga störfum sínum í sem fyllstu samræmi við eðli og þarfir nemenda sinna, hjálpa þeim að öðlast heilbrigð lífsviðhorf, efla andlegan og líkamlegan þroska þeirra og veita þeim fræðslu, hverjum eftir sínum þroska.

3. gr.

Kennari skal kappkosta að vera nemendum til fyrirmyndar í hegðun sinni og framkomu allri. Hann skal leggja kapp á að glæða starfsáhuga nemenda sinna og skapa hjá þeim hollar og heilbrigðar venjur. Refsingum skal aldrei beitt nema að yfirlögðu ráði, þegar mildari aðferðir hafa ekki borið árangur. Gæta skal kennari þess að ámæla aldrei nemanda né hegna honum fyrir hæfileikaskort, og yfirleitt ber honum að varast allt, er vakið getur eða aukið minnimáttarkennd hjá nemendum.

4. gr.

Kennari skal leggja áherzlu á, að börnin læri að hugsa og starfa sjálfstætt. Gæta skal hann þess að skýra vel ný atriði í námsgreinum og stilla öllum kröfum til nemenda svo í hóf, að þær verði þeim ekki ofviða, en fylgjast vel með því, að þeir uppfylli eftir beztu getu þær kröfur, sem til þeirra eru gerðar.

II. Starfstími kennara.

5. gr.

Kennara er skylt að kenna þann kennslustundafjölda á viku, sem lög og reglur ákveða. Með samþykki fræðslumálastjóra geta önnur nauðsynleg störf í þágu skólans komið í stað kennslu að einhverju leyti.

6. gr.

Fækka skal kennslustundum kennara, er þeir verða 55 og 60 ára, um þann stundafjölda á viku, sem tilgreindur er í lögum hlutaðeigandi skóla.

7. gr.

Stundahlé ber að skoða sem starfstíma kennara. Heimavinna vegna undirbúnings kennslustunda og úrvinnslu verkefna frá nemendum, sem ekki er greitt fyrir sérstaklega samkvæmt reglugerð eða ráðuneytisbréfi, telst jafngilda 50% af kennslustundafjölda kennarans. Prófstörf kennara jafngilda kennslustörfum. Þóknun fyrir framangreinda heimavinnu og prófstörf er innifalin í föstum launum kennara.

8. gr.

Daglegur starfstími kennara í skólanum skal vera samfelldur, nema skólastjóri og kennarar eða kennarafundur verði ásáttir um annað.

Starfstími skóla er á tímabilinu kl. 9—17 með matarhléi á venjulegum matmálstíma.

Hefji skóli starf fyrir kl. 9.00, skal hann ljúka störfum þeim mun fyrir. Á laugardögum skal kennslu lokið kl. 12.30, nema sérstaklega sé um annað samið.

III. Helztu störf.

9. gr.

Á þeim tíma, sem kennara ber að vera í skólanum, skal hann:

- 1) annast kennslu samkvæmt stundaskrá og undirbúa næstu kennlustund í stundahléi,
- 2) hafa umsjón með söfnum og áhöldum eða annast önnur skyld störf í þágu skólans,
- 3) fylgjast með því, að borð, sæti, birta, loftræsting, hreinlæti og annað, er snertir aðbúnað nemenda í skólanum, sé þannig, að þeir fái sem best notið kennslunnar,
- 4) hafa umsjón með einstökum deildum skólans og heimavistarnemendum, þar sem þeir eru,
- 5) hafa umsjón og eftirlit í stundahléum eftir þörfum skólans og aðstöðu kennara, annast um að nemendur hlýði settum reglum og fyrirmælum, meðan þeir eru í skólanum, bæði innan húss og á leiksvæði,
- 6) færa reglulega dagbækur, nemendaskrár og einkunnabækur, enn fremur aðrar nauðsynlegar skýrslur eftir samkomulagi við skólastjóra,
- 7) úthluta bókum og áhöldum til nemenda, eftir því, sem fyrir hann er lagt,
- 8) gefa stjórn skólans upplýsingar um nemendur, þegar þess er óskað,
- 9) aðstoða við móttöku og skráningu nýrra nemenda og próf,
- 10) hafa samband við forráðamenn nemenda sinna, ef þurfa þykir,
- 11) veita að öðru leyti þá hjálp í þágu skólans og starfsemi hans, sem óskað kann að verða eftir af stjórn skólans og er í samræmi við gildandi lög og reglur um kennslu og skólamál,
- 12) vera nemendum sínum til fyrirmyndar um stundvísí og háttvísí.

10. gr.

Telji kennari þörf á endurbótum á áhöldum skólans eða öðru, sem snertir kennslustarfið, skal hann ræða um það við skólastjóra.

IV. Um nemendur.

11. gr.

Kennari skal þann tíma, er skóli starfar, gera sér far um að fylgjast sem best með nemendum í þeim deildum, er hann kennir eða hefur aðalumsjón með. Telji kennari framkomu nemanda, námsgetu, ástundun eða aðbúð athugaverða, skal hann eftir föngum kynna sér orsakir þess og gera skólastjóra aðvart um það. Kennari leiðbeini nemendum um heimanám, eftir því sem við verður komið.

12. gr.

Sýni nemandi mótþróa eða óhlýðni eða veitist kennaranum erfitt að halda uppi aga og geti hann ekki kippt því í lag sjálfur, ber honum að tilkynna það skólastjóra og tjá honum alla málavöxtu.

V. Um leyfi frá störfum.**13. gr.**

Geli kennari ekki komið á réttum tíma til kennslu eða forfallist hann vegna veikinda eða af öðrum ástæðum, ber honum að tilkynna skólastjóra það þegar í stað.

14. gr.

Kennslukona, sem á von á barni, skal að jafnaði fá 6 vikna leyfi frá störfum fyrir og 6 vikur eftir barnsburð — eða samtals 90 daga.

Að öðru leyti en að framan greinir fer um veikindaforföll kennara, réttindi þeirra og skyldur eftir lögum um réttindi og skyldur opinberra starfsmanna og reglugerðum, sem settar hafa verið eða verða settar í samræmi við þau lög.

15. gr.

Þurfi kennari að fá leyfi frá störfum, sem svarar allt að einum degi í mánuði þann tíma, sem skóli starfar, skal hann sækja um það til skólastjóra, en sé um lengri tíma að ræða, þarf einnig samþykki skólanefndar og fræðslumálastjóra.

16. gr.

Um orlof eftir 10 ára starf gilda ákvæði í lögum fyrir viðkomandi skólástig.

VI. Um ágreining í starfi o. fl.**17. gr.**

Nú greinir kennara og skólastjóra verulega á um einhver atriði í starfi kennarans, og náist ekki samkomulag, getur annar hvor aðilinn eða báðir lagt málið undir álit eða úrskurð skólanefndar.

Kæri annar hvor aðilinn, er honum skylt að tilkynna hinum það og færa fram ástæður.

18. gr.

Nú tekst skólanefnd ekki að koma á sáttum, eða annar aðilinn er óánægður með úrskurð hennar, getur hann þá skotið málinu til námstjóra og fræðslumálastjóra. Takist þá eigi settir, skal vísa málinu til menntamálaráðherra. Úrskurði ráðherra verður eigi áfrýjað, nema málið heyri undir dómstóla.

19. gr.

Sé um mjög alvarlegar eða þungar sakir að ræða á hendur kennara og hann láti eigi skipast við áminningu, getur skólanefnd vikið honum úr stöðu sinni um stundarsakir fyrirvaralaust, en tilkynna skal nefndin það fræðslumálastjóra tafarlaust.

VII. Ýmis ákvæði.**20. gr.**

Kennarar skulu gera sér far um að kynna sér nýjungar í kennslustörfum, enn fremur sæki þeir kennaranámskeið og kennaraþing, eftir því, sem ástæður þeirra leyfa.

21. gr.

Setning kennara gildir aðeins þann tíma, sem tilgreindur er í setningarbréfi hans, og ráðning stundakennara aðeins yfir starfstíma skólans frá ári til árs.

Óski settur kennari að halda stöðu sinni, skal hann gera skólastjóra aðvart um það í lok kennslutímans, en hann tilkynnir það skólanefnd. Kennari við heim-

angöngubarnaskóla getur farið fram á skipun í stöðu sína, þegar hann hefur gegnt henni í 1 ár, en kennari við heimavistarbarnaskóla og skóla gagnfræðastigsins, þegar hann hefur gegnt henni í 2 ár. Afgreiðsla um skipun fer sömu boðleið og um setningu sé að ræða.

Hafi kennari ákveðið að skipta um stöðu, skal hann tilkynna það skólastjóra eða skólanefnd, svo fljótt sem auðið er, helzt í lok kennslutímans að vorinu.

Ákvæði til bráðabirgða.

Ef ekki er unnt eftir ákvæðum 8. gr. að semja stundaskrá, sem fullnægi gildandi námsskrá, vegna þess að tví- eða þrisetning í skólahúsnæði er óhjákvæmileg eða kennsla sérgreina verður að fara fram á öðrum tímum en þar segir, þá má skólinn starfa lengur en greinin gerir ráð fyrir, sbr. 31. grein laga nr. 38/1954, um réttindi og skyldur starfsmanna ríkisins.

Erindisbréf þetta er sett samkvæmt lögum nr. 34/1946, um fræðslu barna, og lögum nr. 48/1946, um gagnfræðanám.

Menntamálaráðuneytið, 1. júní 1962.

Gylfi Þ. Gíslason.

Birgir Thorlacius

REGLUGERÐ

um breytingu á reglugerð nr. 78 27. maí 1960, um innflutnings- og gjaldeyrisleyfi.

1. gr.

Eftirtaldar vörur falli niður úr 1. gr. reglugerðarinnar:

Tollskrá:

Kafli	Nr.	Vörutegund:
37	15	} Skrautvarningur úr skinni og leðri, trjáviði, pappa og pappír, leir, postulíni, gleri og ódýrum málmum.
40	59	
44	45	
59	10, 12b	
60	25	
71	23	} Tígulgólf (parketstafir og plötur), einnig úr öðrum efnum en korki.
40	34,b	
	55	Skiði og skiðastafir.
58	5	Granít- og marmaraplötur, sléttar eða slípaðar.
61	5, 8, 11	Vörur úr gulli, silfri og platínu.
63	8 c	Krómstálpötur, þynnri en 3 mm, ryð- og síruheldar.
	88a	Skálar, pressaðar, til vaskagerðar.
	88b	Eldhúsvaskar.

2. gr.

Reglugerð þessi, sem sett er samkvæmt lögum nr. 30, 25. maí 1960, um skipan innflutnings- og gjaldeyris mála, öðlast þegar gildi.

Viðskiptamálaráðuneytið, 30. marz 1962.

Gylfi Þ. Gíslason.

Oddur Guðjónsson.